

LATGALIŠU GAZETA

“Atzolys” – eipašuo, jaunuo latgališu kultura

Kū vaira volūdu, tū lobuok! **LaKuGa.LV**

Jau sastū godu piec kuortys nūtyka jaunišu seminars “Atzolys” (atlasis, atvasis, jauni dzynumi). Itūgod – Preiļūs i pyrmū reizi tū reikuoja nu jau bejuši atzoliši, pošreizeji studenti – “Latgolys Studentu centra” bīdri.

Anita Novicka

Daleibu seminarā var pisaceit kotrs, kurs gryb izzynuot Latgolys kulturys boguoteibu, viesturi, apgiut latgališu rokstu volūdu, apszynuot sovu unikalitati... Taidā veidā teik veicynuota jaunišu interese leidzadorbuotīs Latgolys atteisteibā, volūdys i kulturys saglobuošonā. “Atzolos” pyrmū reizi itūgod bejuši jauniši ari nu Daugovpiļs pūsis, kai ari 2 meitinis nu Lelvuordis.

Organizatoru puordūmys: – Mes vysy asam kai vīna saime. Kotru vokoru nūteik muzikali i teatralizāti prišknasumi, tymūs jauniši isajūt sovu vyspuordrūšuokūs fantazeju tālūs, tai jī atsaļaun byut jī pošī. Dzišmu dueļa laikā, kod tyka dzīduotys dzismis tikai latgališu volūdā, pateikams puorsteigums beja, kod nūslāgumā atzoliši kūpā nūdzīduoja dzīsmi “Skaidra volūda”. Vysy zynuoja vuordus, dzīduoja ar sirdi, tai aplīcynojuot sovu patriotismu. Latgališa gors, kas ir kotrā nu myusu, pīaug, kod asam vysy kūpā.

Iz pasauļa tūmār ir vīna vīta, kur pastuov šaids lykums: runuot dreikst tikai latgaliski. Šei vīta ir “Atzolys”. Atvīerteiba, sirsneiba, smaidi ite sateikami iz kotra sūļa. Tī teik uzjīmti reita rūsmis laikā, kurā kotrs velta vysim atzolišim apskuovīņus i loba vieliejumus. Kotrys iediņreizis suokumā teik dzīduota tautysdzīsmē “Ai, gaļdeni”. Kasdīnys nūteik daņči – isapazeišona ar tautys deju sūlim. It korstai, i elpu navar dabuot atpakaļ vēļ ilgi. Deļtuo pyrms čūčumuižys teik dzīduota mīga dzīsmēņa.

“Atzolu” laikā Rēzeknis Augstškolas profesore Ilga Šuplinska vadeja lekceju par latgališu volūdys lituošonu. Apsaverūt raidejumu nu projekta “Latgaliešu valoda televīzijā”, tyka izzynuoti jaunumi latgališu volūdys i literaturys jūmā.

Eipaši jaunišus aizruovuse naseņ izguojušo myusdīnu latgališu dzejis antologeja “Susātivs”. Filologe Muora Mortuzāne snēdze imanis latgališu volūdys pareizraksteibā. Ireta Čekse izstuosteja prezentiešonys muokslu, Jurs Viļums – par latgališu aktualitatem internetā.

“Atzolos” nūdereigys līty teik apgiutys aizrauteigā atpyutys procesā. Kaidu nakti tyka sareikuota nakts styga. Tymā beja seši kontrolpunkti, kurūs tyka puorbaudeitys atzolišu prasmis Latgolys viesturē i kulturā, tradicionālūs daņču zynuošonā, latgališu dzišmu atpazeišanā.

Vīna nu Atzolu tradicejom ir T-kraklu apglaznuošona. Itūgod pyrmū reizi krakli tyka viertieti. Zalta medaļa tyka piškierita mežvidītīs Līgys kraklam, iz tuo attāluots kūks, zam kura siež cylvāks ar nolīktu golvu. Tys ciļvieceņš asūt Līga pošā. “Atzolys” lykušys jai puordūmuot dzeivi. Īspiejams, ir laiks pasamaineit. Sūplok dyžanam ūzulam aug jauna atlase, kura sapņoj kod navīj byut tik varona kai ūzuls, tik stipri turētis ar saknem sovā zemē. Tagad jaunajai atlasei vajadzeigys stypruo ūzula idrūšnyuojums i atbolsts.

Lai naaizamierstu seminarā pīdzeivotaits i sakuopynuotuos emocejis, kai kot-



Baiba Vingre nu Kolupa pīcojās, ka latgaliski var runuot na tikai sātā

ru godu teik izdūta Atzolu avīze. Kotrs tuos numurs ir ekskluzivs. Vairumtierdzniecībā nav piejams.

Daugovpilīti Baibu puorsteidze kontaktiešonuos ar vīnaudžim latgališu volūdā, deļtuo ka latgaliski jei runoj tikai sātā.

– Deļtuo ite jūtūs kai sātā. Maņ pateik vysy. Kotra aktivitāte ir vinreizeja. Capurī nūst organizatoru priškā par izdūmu! Ite kotrs var sevi realizēt.

Aija nu Lelvuordis par Latgolu suoce interesētis piec tuo, kod, pīsadolūt televīzejis šovā “Koru kari”, isapazyna ar jaunišim nu Daugovpiļs kuora. Ir paguojis tikai gods, bet Aija jau breineigi runoj latgaliski:

– Mani saisteja latgališi, latgališu volūda, kultura. Suoču regulari skaitēit Latgališu kulturys gazetu internetā, klausejūs Latgolys Radeju, dzīsmis latgališu volūdā, apmeklieju latgališu grupu koncertus Reigā. Ejūt iz školu, pošā ar sevi runuoju, deļtam ka maņ nabeja, ar kū runuot latgaliski. “Atzolys” paleidz ipazeit latgaliskū i latgališus. Pats lobuokais maņ ite ruodīs tys, ka vysy runoj latgaliski. Tyvuokajā laikā isasaisteišu “Latgolys Studentu centra” darbeibā i pasuokumu organiziešonā. Suokūt studejis Reigā, obligati vuiceišūs latgališu volūdu kursūs

Nacionalajā bibliotekā. Skaitu, ka vysai Latvejai juoparuoda, ka mes asom vīnuoti – myusim, latvišim, ir vīna kūpeiga kultura. Latgolys kultura ir vins atzors nu latvišu kulturys. Deļtuo tī latviši, kas latgališus nanūvīertej, smej pošī par sevi. Latgola ir myusu – latvišu – vīerteiba. Zynu, ka latgališim ir cytaiduoks temperaments, jimūs ir ceineituoja gors, partū ka vysy laiku ir par koč kū juosaceina. “Atzolos” vysy laiku sasajutu pacyluoti. Drusku lidineju vīers zemis...

Nūslāguma pasuokuma laikā kotram atzolišam izduovynuoja “Atzolu” trokuma čaju ar dereiguma termeņu leidz nuokamajom “Atzolom”. Dažys sastuovdalis: 20 smaidi, vairuok kai 100 apskuovīni, 11 “Ai, gaļdeni”, 27 slapani draudzeni, vairuok kai 4 mīga dzīsmis, 54 meili ocu skoti.

NŪTIKŠONU KALEŅERS

● **29.08.2009 Šlagerparads Latgolā i grupys Patrioti.lg albuma prezentaceja**
Rēzeknes Kulturys i atpyutys parks, Rēzekne
Festivalā pīsadaleis: “Patrioti.lg”, “Apvedceļš”, Inga i Normunds, “Klaidonis”, Irēna Ancāne i citi. Pasuokuma laikā nūtikis ari grupys “Patrioti.lg” pyrmuo albuma “Daugaveņa” prezentaceja.

● **10.09.2009 Muzykalais pasuokums “Taiseits Latgolā / Made in Latgola”**
Vīsnieca “Latgola”, Daugavpiļs
Vīsniecy “Latgola” 10.stuovā nūtikis latgališu muzykys pasuokums – pīsadola: BezPVN, L.P.I.V. i Dabas Durovys. Paradzāta ari grupys Dabas Durovys jaunuo video klipa prezentaceja!

● **12.09.2009 Marijai Andžānei – 100 Škaune, Dagdys nūvods**
Kūpeigi atzeimesim dzejneicy nūvodneicy Marijis Andžānis jubileju. Pasuokumā dzejis lasejumi nu Annys Rancānis, Ontona Slišāna, Valentina Lukaševiča, Oskara Seiksta, Līgys Rundānis, kai ari byus Sovvaļnika diska “Sūpluok” prezentaceja.

● **18.09.2009 Latgališu muzyka Reigā “Taiseits Latgolā / Made in Latgola”**
Klubs “DEPO”, Reiga, Vaļņu iļā 32
Pīsadola: Dabas Durovys, Green Novice, D-Light, The Highway, Zaļuo Zeme i.c. grupys... Dīnu pyrms tam – 17.septembrī kopejneicā “Leningrad” grupys “Dabas Durovys” jaunuo videoklipa prezentaceja Reigys publikai.

● **19.09.2009 Vacuokais latgališu meilys aiļu festivals “Upītes Uobeļduorzs”**
Škilbāni, Viļakys nūvods
Pīsadola vysys aktivuojuos latgališu muzykys grupys i rokstūši latgališu aiļinīki. Vairuok informacejis skaitīt portalā LaKuGa.LV

Latgališu Gazety lopā ir puoruok moza, lai mes varātu nūpublicēt vysus rokstus, deļtam aicynojam isapazeit ar portāla LaKuGa.LV juļa mīneša rokstu arhīvu:

- Latgališi nu Sibira gastej Aulejā Senāts: latgaliešu rakstu valoda Latvijā atzīstama par svešvalodu
- Breivūs ļaužu apvīneiba “Latgolys Saeima”
- Sūplokums / Patmaļņiku Domuss
- Borova Mc prezentej Sirsneibys mīnesi i duovoj dzīsmi
- Aglyuna 2009 – atskots iz spredikim
- Dzīsmē nu “Dabas Durovu” – “Vysy izrunuots”
- Pluovi i dareituoji dūmu pyni pogolmi / augusts Leidzjuteiba / Latgolys gora maņtīneica Valentina Ivanovska (Celeitāne)
- “Bez PVN” videoklipa “Je” priškā stāteišona obrozūs
- Vīngobolaineiba / V.Lukaševičs
- Kasnedelis radejis raidejumi “Latgolys Vuords nu Reigys”

“Latgališu Gazetu” atbolsta Latgolys regiona atteisteibys agentura i Kulturkapitāla fonds.

